

言但舉其綱見始凡事不可盡書說也子自深計其意唯唯行去矣說何極乎勿復有可問也唯唯

右天諫正書訣

太平經卷之四十三

太平經卷之四十四

案書明刑德法第六十

真人純謹敬拜純今所問必且為過責甚深吾歸思師書言悉是也無以易之也但小子愚且蒙悞悞不知明師皇天神人於何取是法象今惟師言積大口口願師既哀憐示其天證陰陽之訣神祇之下要效今且不思心中大煩亂所言必觸師之忌諱又欲言不能自禁絕唯天師雖非之願以天之明證法示教使可萬萬世傳昭然無疑比若日中之明也終始不可易而去也然子固固不信吾言邪子自若未善開通知天心意也子自若愚乎愈於俗人無幾耳以為吾言可犯也犯者亂矣逆者敗矣吾且與子語皆已察考於天文合於陰陽之大訣乃後言也子來者為天問事吾者為天傳言制法非敢苟空偽言佞語也子生積歲月日幸不少獨不見擾擾萬物之屬悉盡隨德而居而反避刑氣邪此者純皇天之明要證也所以嚴勸人君之治得失之效也唯唯今若且覺而未覺願重問其

教戒然夫刑德者天地陰陽神治之明效也為萬物人民之法度故十一月大德在初九居地下德時在室中故內有氣萬物歸之也時刑在上六在四遠野故外無氣而清也外空萬物去眾皆歸王德隨之入黃泉之下十二月德在九二之時在丑居土之中而未出達時德在明堂萬物隨德而上未敢出見上有刑也正月寅德在九三萬物莫不隨感德樂闕於天地而生時德居庭二月德在九四在卯已去地未及天謫在界上德在門故萬物悉樂出闕於門也三月盛德在九五辰上及天之中感德時在外道巷故萬物皆出居外也四月巳德在上九到於六遠八境感德八方善氣陽氣莫不響應相生擾擾之屬去內室之野處時刑在萬物之根居內室故下空無物而上茂盛也莫不樂從德而為治也是治以德之大明效也今謹已聞用德願聞用刑然五月刑在初六在午地下下內清無氣地下空時刑在室中內無物皆居外六月刑居六二在未居土之中未出達也時刑在

堂時刑氣在內德氣在外擾擾之屬莫不樂露其身歸感德者也七月刑在六三申之時刑在庭萬物未敢入固固樂居外八月刑在六四酉時上未及天界時德在門萬物俱樂闕於門樂入隨德而還反也九月刑在六五在戌上及天中時刑在道巷萬物莫不且死固隨德入藏故內日與外者空亡十月刑在上六亥時刑及六遠八境四野萬物擾擾之屬莫不入藏逃隨德行到于明堂踐行目懷居內野外空無士眾是非好用刑罰者見從去邪哉但心意欲內懷以刑治其士眾輒日為其衰少也故五月內懷一刑一羣眾叛六月內懷二刑二羣眾叛七月內懷三刑三羣眾叛八月內懷四刑四羣眾叛九月內懷五刑五羣眾叛十月內懷六刑六羣眾叛故外悉無物皆逃於內是明證效也故以刑治者外恭謹而內叛故士眾日少也是故十一月內懷一德一羣眾入從十二月內懷二德二羣眾入從正月內懷三德三羣眾入從二月內懷四德四方羣眾入從三月內懷五陽威

德五羣眾賢者入從四月內懷六德萬物並出見莫不擾擾中外歸之此天明法效也二月八月德與刑相半故二月物半傷於寒八月物亦半傷於寒三月之時德欲出其士眾於門刑欲內其士眾於門俱在界上故二月八月萬物刑德適相逢生死相半故半傷也子今樂知天地之常法陰陽之明證此即是也夫刑乃日傷殺厭畏之而不得眾力反曰無人德乃舒緩日生無刑罰而不畏萬物反曰降服悉歸王之助其為治即是天之明證昭然不疑也今人不威畏不可治奈何乎哉然古者聖人君子威人以道與德不以筋力刑罰也不樂為善德者反欲以刑罰威驚以助治猶見去也夫刑但可以遺窮解卸不足以生萬物明擾擾之屬為其長也今使人不內附反欺詐其大欲在此今子比連時來學問事雖眾多畜積文則未能純信吾書言也得此寧解未哉純信首敬拜有過甚大負於明師神人之言內慙流汗但愚小德薄至賤學日雖多心頓不能究達明師之言故敢

不反復問之甚大不謙久為師憂不也但為子學未精耳可慎之天乃為人垂象作法為帝王立教令可儀以治萬不失一也子欲知其意正此也治不惟此法常使天悒悒忿忿不解故多凶災子戒之天將興之者取象於德將衰敗者取法於刑此之謂也吾之言謹與天地陰陽合其規矩順天地之理為天明言紀用教令以示子也吾之言正若鋒矢無異也順之則日興反之則令自窮也天法神哉神哉是故夫古者神人真人大聖所以能深制法度為帝王作規矩者皆見天文之要乃獨內明於陰陽之意乃後隨天地可為以治與神明合其心觀視其可為也故其治萬不失一也今愚吏人民以為天法可妄犯也自恣不以法度故多亂其君治也大欲在此也今子得書何不詳結心意丁寧思之幽室闕處念天之行乃可以傳天之教以示勸惡人以助帝王為法度也將舉刑用之當深念刑罰之所居皆見從去寂然無士眾獨處故冬刑在四野無人萬物悉叛之內藏避之甚

夏刑在內萬物悉出歸德地下室內中空刑  
寂然獨居皆隨德到野處德在外則萬物歸  
外德在幽空則物歸內天刑其威極盛幸能  
厭服人民萬物何故反不能拘制其士衆獨  
不悛斯耶明刑不可輕妄用傷一正氣天氣  
亂傷一順氣地氣逆傷一儒衆儒亡傷一賢  
衆賢戡凡事皆有所動搖故古者聖人聖王  
帝主乃深見是天戒書故畏之不敢妄爲也  
恐不得天心不能安其身也上皇天德之人  
乃獨深見道德之明效也不厭固不畏駭而  
士衆歸之附之故守道以自全守德不敢失  
之也子德吾書誦讀之而心有疑者常以此  
書一卷自近且夕常業視之以爲明戒證效  
乃且得天心意也違此者已與天反矣是猶  
易之乾坤不可反也猶六甲之運不可易也  
猶五行固法不可失也猶日月之明不可掩  
蓋也猶若君居上臣在下故不可亂也此所  
以明天地陰陽之治有好行德者或有愚人  
反好刑宜常觀視此書以解迷惑務教人爲  
善儒守道與德思退刑罰吾書口口正天法

度也夫爲道德易乎爲刑罰難乎愛之則日  
多威之反日無也子疾去矣爲天傳吾書毋  
疑也吾書言不負於天地六合之擾擾也唯  
唯誠歸思過惟論上下不敢失一也行戒之  
慎之子不能分別詳思吾書意但觀天地陰  
陽之大部也從春分到秋分德居外萬物莫  
不出歸王外蟄蟲出穴人民出室從秋分至  
春分德在內萬物莫不歸王內蟄藏之物悉  
入穴人民入室是以德治之明效也從春分  
至秋分刑在內治萬物皆從出至外內空寂  
然獨居從秋分至春分刑居外治外無物無  
氣空無士衆悉入從德是者明刑不可以治  
之證也故德者與天并心同力故陽出亦出  
陽入亦入刑與地并力同心故陰出亦出陰  
入亦入德者與生氣同力故生氣出亦出入  
亦入刑與殺氣同力故殺氣出亦出入亦入  
德與天上行同列刑與地下行同列德常與  
實者同處刑與空無物同處德常與興同處  
故外興則出內興則入故冬入夏出刑與衰  
死氣同處故冬出而夏入死氣者清故所居

而清也故德與帝王同氣故外王則出陰內  
王則入刑刑與小人同位故所居而無士衆  
也物所歸者積帝王德常見歸故稱帝王也  
刑未嘗與物同處無士衆故不得稱君子是  
故古者聖人獨深思慮觀天地陰陽所爲以  
爲師法知其大口口萬不失一故不敢犯之  
也是正天地之明證也可不詳計乎可不慎  
哉自然法也不以故人也是天地之常行也  
今悉以告子矣子宜反復深思其意動作毋  
自易唯唯不敢負行吾已悉傳付真法語於  
子吾憂解矣爲天除咎以勅至德以興王者  
子毋敢絕且蒙其害唯唯

右案天法以明古今前後治者所好得失  
訣

太平經卷之四十四